

Aappassaaneerinissamut akissuteqaat nutaaq

(Siunnersuutip Aningaasaqarnermut Akileraartarnermullu Ataatsimiititaliami suliarineqaqqittussanngorlugu innersuunneqarnera tunngavigalugu)

Suliffeqarfissuit immikkoortortallit, suliffeqarfissuarni piginnittut aalajangersimasumillu ingerlatsiviusut akornanni nakkutigisaasumik nussuisarnerit akiinik aalajangersaasarnerit pillugit malitassat nalilersoqqissaqqullugit inernalu UKA2019-imi agguateqqullugu Naalakkersuisut peqquneqarnissaannik Inatsisartut aalangiiffigisassaattut siunnersuut (“Transfer-pricing”). Matumani siunertarineqarpoq akileraartarnikkut pilersarutipalaalersorsinnaanerit pinngitsoortinniarlugit malitassat sukateriffigineqarsinnaanerit, taassumalu ataani ulluinnarni ingerlatsinerit ataqqineqarnissaat.

(Inatsisartunut ilaasortaq, Henrik Fleischer, Siumut)

Akissuteqaat

(Aningaasaqarnermut Nunanilu Avannarlerni suleqatigiinnermut Naalakkersuisoq)

Aappassaaneerininneq

Aningaasaqarnermut Akileraartarnermullu Ataatsimiititaliap ilassutitut isumaliutissiissuteqarneranut Naalakkersuisut sinnerlugit qujassuteqarfigaara.

Naliliissutip UPA2021-mi agguanneqarnissaa siunertaralugu allannguutissatut siunnersuut akuerineqassasoq ataatsimiititaliamit isumaqatigiittumit inassutigineqarpoq.

Naliliissut naammaginarloq qaqugukku naammassineqarsinnaanersoq eqqarsaatigalugu Naalakkersuisut isumaat ataatsimiititaliap allannguutissatut siunnersuutaata oqaasertaliornerani ataatsimiititaliamit tusaaniarneqarsimammat Naalakkersuisunit nuannaarutigineqarpoq. Taamali kinguartitsiniarneq Naalakkersuisunit naapertuuttutut isigineqartumit sivikinneerarsuuvoq. Naliliissut UPA2021-mi agguanneqartussaq nakkutigisaasumik nussuinerit uppernarsaasiinissaq pillugu malittarisassat nutaat pillugit misilittakkatigit tunngavissat killeqartut tunngavigalugit suliarineqassasoq naatsorsuutigineqarsinnaavoq.

Taamaalilluni paasissutissiissutigineqassaaq ilaatigit nakkutigisaasumik nussuinerit pillugit malittarisassat nutaat tunngavigalugit nammineerluni nalunaarsuiffimmik tunniussinissaq siullermik ukiumi akileraarfiusumi 2019-imi pissammat. Tassa imaappoq malittarisassat nutaat malillugit nammineerluni nalunaarsuiffik ulloq 1. juli 202-mi tunniunneqareersimassaaq. Taamaalillunilu naliliinissap kissaatigineqartup suliarineqarnissaa siunertaralugu ukiumi akileraarfiusumi ataatsimi nalunaarsukkat kisimik atornerqarsinnaassapput. Tunngaviusumik isigalugu malittarisassat naammaginarlumik nalilersorneqarnissaannut tamanna tunngavigissallugu annikippallaarpoq.

Tamatuma saniatigut tassunga atatillugu oqaatigineqassaaq assersuutigalugu suliap ataatsip aallartinneranit eqqartuussivimmi suliaqartoqassappat tamatuma naammassineqarnissaata tungaanut ukiut marluk-sisamat ingerlasinnaammata.

Taamaattumillu Naalakkersuisut allannguutissatut siunnersuut saqqummiuteqqaagaat tapersersorneqaqqullugu Naalakkersuisunit kaammattuutigineqarpoq.

Ataatsimiititaliap allannguutissatut siunnersuutaata taperserneqarnissaanik Inatsisartut aalajangissappata ataatsimiititaliamit inassuteqaat tunngavilersuullu Naalakkersuisunit soorunami tusaatissatut tiguneqassapput aammalu piffissap taamaalinerani tunngavigineqarsinnaasut tunngavigalugit naliliissummik suliaqarniarumaarlutik.

Taama oqaaseqarluni siunnersuut Inatsisartunut oqaluuserisassanngortippara.